



Reglament dalla biblioteca

per la vischnaunca Lumnezia

Cuntegn

I.	Determinaziuns generalas	3
Art. 1	Purtadra	3
Art. 2	Intent, porschida e tecnica	3
II.	Determinaziuns specialas	3
Art. 3	Organisaziun	3
Art. 4	Menader dalla Biblioteca Lumnezia	3
Art. 5	Finanzas e contabilitad	4
III.	Determinaziuns finalas	4
Art. 6	Vigur	4

Reglament dalla biblioteca per la vischnaunca Lumnezia

dils 23 da settember 2013

La suprastonza communal,

sebasond sin art. 55 lit. a dalla Constituziun dalla vischnaunca Lumnezia dils 23 da settember 2012,

concluda:

I. Determinaziuns generalas

Art. 1 Purtadra

Purtadra dalla biblioteca populara e da scola Lumnezia ei la vischnaunca Lumnezia. La biblioteca vegn menada sut il num Biblioteca Lumnezia.

Art. 2 Intent, purschida e tecnica

¹ La biblioteca survescha all'informaziun, alla tgira dalla cultura, alla formaziun, al passatemp per carschi ed affons. Ella porscha cudischs ed ulteriuras medias. La vischnaunca metta a disposiziun localitads adattadas. Ella ei center da sentupada e duei esser aviarta sufficientamein per nosa populaziun sco era per nos hosps.

² La purschida duei esser multifara e cumpigliar ils differentes camps. Ella duei vegnir actualisada periodicamein.

³ La sistematica, presentaziun e registraziun sedrezza tenor la tecnica da lavur proponida dalla cuminonza da lavur dallas bibliotecas Svizras publicas (CLP).

II. Determinaziuns specialas

Art. 3 Organisaziun

¹ Il cau dil departament cultura, sanadad e segirtad sociala representa la suprastonza communal Lumnezia ella cumissiun da biblioteca. La suprastonza communal Lumnezia elegia igl assessur dalla cumissiun da biblioteca ed il menader dalla Biblioteca Lumnezia.

² La cumissiun da biblioteca seconstituescha sesezza enten eleger in president ed in actuar. Dalla cumissiun da biblioteca fan il cau dil departament cultura, sanadad e segirtad sociala dalla suprastonza communal Lumnezia, il menader dalla Biblioteca Lumnezia, sco era in assessur part.

³ La cumissiun da biblioteca ha las suandontas incumbensas:

- surveglar tut ils fatgs dalla Biblioteca Lumnezia
- approbar igl uorden da diever dalla Biblioteca Lumnezia
- fixar las incumbensas dil menader dalla Biblioteca Lumnezia
- approbar la planisaziun da plazzas dil menader dalla Biblioteca Lumnezia
- eleger ils collaboraturs dalla Biblioteca Lumnezia
- preparar il preventiv per mauns dalla suprastonza communal Lumnezia
- suttametter propostas per mauns dalla suprastonza communal Lumnezia

Art. 4 Menader dalla Biblioteca Lumnezia

¹ Il menader dalla Biblioteca Lumnezia ei responsabels per il menaschi dalla biblioteca. El sestenta per in'andanta formaziun persunala ed instruescha ses collaboraturs. El tgira la collaboraziun cun las scolas.

² Il menader dalla Biblioteca Lumnezia ha las suandontas incumbensas:

- administrar ed organisar il menaschi dalla Bilioteca Lumnezia tenor directivas dalla cuminsonza da lavur dallas bibliotecas Svizras publicas (CLP)
- menar igl inventari e registrar ils mieds tenor directivas dalla cuminsonza da lavur dallas bibliotecas Svizras publicas (CLP)
- elavurar igl uorden da diever dalla Biblioteca Lumnezia
- preparar la planisaziun da plazzas dalla Biblioteca Lumnezia
- proponer collaboraturs per l'elecziun entras la cumissiun da biblioteca
- fixar il plan da lavur dils collaboraturs dalla Biblioteca Lumnezia
- menar il rapport da lavur dils collaboraturs dalla Biblioteca Lumnezia
- responsabladad ch'il preventiv vegn risguardaus e buca surpassaus
- controllar e visar tut ils quens e surdar quels all'administraziun communal Lumnezia

Art. 5 Finanzas e contabilitad

¹ Il quen dalla biblioteca vegn menaus dall'administraziun communal Lumnezia ed ei part integrala dil quen communal dalla vischnaunca Lumnezia.

² Il menader dalla Biblioteca Lumnezia obtegn in'indemnisaziun pauschala da CHF 600.00 ad onn per las lavurs generalas ed administrativas. Igl assessur obtegn in'indemnisaziun pauschala da CHF 300.00 ad onn per tutta lavur enteifer la cumissiun che cumpetta ad el.

³ Ils collaboraturs dalla Biblioteca Lumnezia vegnan indemnisai cun CHF 28.00 per ura. In daner da vacanzas sco era ina 13avla paga meinsila ein cumpri ell'indemnisaziun per ura. Quintadas vegnan las uras da presenza duront il temps d'avertura dalla Biblioteca Lumnezia sco era lavurs preparatoricas tenor incumbensa dil menader dalla Biblioteca Lumnezia. Las sesidas dalla cumissiun da biblioteca vegnan indemnisadas tenor reglament da salarisaziun per la vischnaunca Lumnezia.

⁴ Spesas vegnan indemnisadas tenor reglament da salarisaziun per la vischnaunca Lumnezia.

III. Determinaziuns finalas

Art. 6 Vigur

Quest reglament va en vigur retroactivamein cun igl 1. da schaner 2013.

Approbau dalla suprastonza communal Lumnezia, ils 23 da settember 2013

Il president communal:

Duri Blumenthal



Il canzlist communal:

Marcus Cavegn